

٢٠- آيه بتقول .. (وَزَلْزَلُوا حَتَّى يَقُولَ الرَّسُولُ وَالَّذِينَ آمَنُوا
مَعَهُ مَتَى نَصَرَ اللَّهُ أَلَا إِنَّ نَصْرَ اللَّهِ قَرِيبٌ)

إزاي زلزلوا ؟ وليه سؤال متى نصر الله ومن الرسول والصحابة؟!

في حاجتين ضروري نتكلم فيهم :

١- إن المأساة الحقيقة إللي وراء كل أمراضنا النفسيه وأحزاننا وعدم
الرضا الللي بنتكسف نبيئنه والبهدلته والوجع إللي عايشينه، أحب
أختصرها في جملة واحده (متفقناش على كده!)

يعني إيه ؟

بالظبط كأنك رايح تشتغل موظف عامل حسابك تمضي
حضور وإنصراف وتعيش حياتك وتتفاجئ بشغل ومرمطة طول
اليوم ..

ولا داخل الجامعه عشان تغير جو وتهزر وتلاقي الدكتور
يقولك طلع ورقه وهنمتحن في إللي أخذناه ..

هتقول متفقناش على كده ! هيقولك إنت إللي مسألتش ولا
فهمت طبيعة الشغلانه إيه ولا الدراسه هنا إيه؟

دي الدنيا .. لها سمات محده .. ليك رساله معينه .. عايش
مدته مؤقتة .. بتسلم ورقة الإمتحان من يوم ميلادك وبتسلمها يوم
وفاتك !

والمنهج هو القرآن وفيه إتفاقات في منتهى الوضوح ،إنك
هتعيش في نقص في الحياة .. ليه؟

مش علشان ربنا يعذبك ..

علشان النقص هيعرفك حقيقتك بالظبط، نقاط قوتك و نقاط
ضعفك هيطلّع أروع ما فيك أو أسوأ ما فيك ..

طريقك إنك تتعرف على إللي خلقك ،صاحب المنظومه دي كلها ..
ده لو تعاملت مع النقص صح .. ولو تعاملت صح ده طريقك الوحيد ،
الوحيد فعلاً لراحة بالك وسكينتك .. حتى لو كان نقصك إيه!

٢- الرُّسل والأنبياء .. بشر معصومين في رسالتهم .. لكن في
تعاملاتهم مع أنفسهم ومع الناس ،هم بشر .. وسرد قصصهم
مش قصص تاريخية أو تعجيزية ، هي دروس لو ركزت فيها
وأسقطها على حياتك هتفرق كتيير أوي ..

الآية :

(أَمْ حَسِبْتُمْ أَنْ تَدْخُلُوا الْجَنَّةَ وَلَمَّا يَأْتِكُمْ مَثَلُ الَّذِينَ خَلَوْا مِنْ
قَبْلِكُمْ مَسَّتْهُمُ الْبَأْسَاءُ وَالضَّرَاءُ وَزَلُّوا حَتَّى يَقُولَ الرَّسُولُ وَالَّذِينَ
آمَنُوا مَعَهُ مَتَى نَصُرَ اللَّهُ أَلَا إِنَّ نَصْرَ اللَّهِ قَرِيبٌ)

الآيه دي مهمة أوي وفيها شرح مبسط لخلاصة فكرة الحياة
ورسالتك فيها وطبيعتك البشريه ..

ربنا بيخاطبنا جميعاً من خلال خطابه للرسول والصحابه :

هل تعتقدوا إنكم هتدخلوا الجنة من غير ما تتعلموا من كل التجارب والدروس إللي مروا بيها كل إللي كانوا قبلكم .. مستهم البأساء (وهو الخوف والشده ويقال في الأموال والأنفس) .. والضراء (وهو الضرر بصفه عامه ويقال في الأبدان) ؟

داقوا ده لحد إمتى ؟!

لحد ما زلزلوا !

يعني إيه زلزلوا؟

عارف زي إيه .. لما تمر بموقف عصيب في حياتك تكتشف فيه نفسك . يا يطلع منك إنسان أقوى ، ثقتك أعلى عندك تسليم أكثر ، عندك رضا واستغناء مستحيل كانوا يحصلولك لولا الموقف ده .. موقف زلزلك من جواك ..

يا يطلع منك إنسان ضعيف ، هَشَّ ، معندوش عزيمة ، أقل حاجة تكسره ، أقل حاجه تشككه في ربه ورحمته وعدله !

وكل واحد ودرجاته .. دول صحابه بقى .. فلما يزلزلوا هيطلع

منهم إيه ؟؟؟

أين نصر الله؟

سؤال فيه إستسلام ورجاء بعد إستنفاد الأسباب تماماً ..

والإجابة لحظيه ..

ألا إن نصر الله قريب!

وده خطوات النصر:

١- تتعلم من التجارب السابقه وتبذل كل البذل لحد ما تتعلم

لأنك لو متعلمتش هتفضل في نفس الدايره..

٢- التغيير.. والمرحله دي مش هتوصلها إلا بعد إستنفاد كل سُبُل

السعي الممكنه وإستغلال قدراتك الحقيقيه

٣- التسليم والثقة في نصر الله .. ساعتها هتقدر تطلب من ربنا

ينصرك

ركزوا كمان في الآية دي ..

(إِذْ جَاءُوكُم مِّن فَوْقِكُمْ وَمِنْ أَسْفَلَ مِنكُمْ وَإِذْ زَاغَتِ الْأَبْصَارُ
وَبَلَغَتِ الْقُلُوبُ الْحَنَاجِرَ وَتَظُنُّونَ بِاللَّهِ الظُّنُونًا . هُنَالِكَ ابْتُلِيَ
الْمُؤْمِنُونَ وَزُلْزِلُوا زِلْزَالًا شَدِيدًا)

تأكد إن الإبتلاءات والبأساء والضراء هي إللي بتعرفك
قدراتك ونفسك الحقيقيه و الزلزال الشديد ده هو إللي هيطلع
منك نفسك الجديده.. فخليها نفس منتصره مش مهزومه!

تخيل بتسيب كل اللي وراك ده وتتدب حظك وتقعده تدور ما
يمكن مفيش رحمه ومفيش عدل!!

والله مفيش وقت .. ومن الآخر الدنيا دي عايزاك تشتغل
على نفسك طول الوقت وتجاهد طول الوقت..

ألا إن نصر الله قريب .. يقين!

